



焦太史編輯國朝獻徵錄卷之六十二

都察院九

巡撫

陸鈞

劉漳

凌鑰

成文

萬潮

車純

丘養浩

劉大謨

婁志德

呂經

葉照

孫繼魯

張綱

朱統

吳瀚

姜儀

張素

石簡

許宗魯

楊宜

戴鱉

劉廷臣

王儀

唐時英

周采

高翀

周如斗

毛鵬

陳洪濛

林潤

熊桴

湯賓

陶大順

李采菲

夏良心

司汝濟

薛夢雷

晉應槐

蕭中

焦太史編輯國朝獻徵錄卷之六十二

都察院九

巡撫

都察院右副都御史石樓陸公鉞行狀

葉應聰

公諱鉞字容之別號石樓姓陸氏系唐宣公後父併  
癸丑進士 孝廟時爲御史有聲兩按福建山東風  
裁凜凜正德初陞福建按察副使以御史時事忤逆  
瑾罷官再罰米輸邊稱貸以償以公貴封都察院右  
副都御史歿而祀於鄉賢公生而穎慧六歲入家塾

請于母曰讀書後幹得可等事業方爲至極母甚喜  
八歲隨父赴京過蘇偶失水出而大聲曰天旣生我  
豈能溺我聞者駭然正德癸酉鄉試中式明年登進  
士授南京車駕主事國朝自都北平留都以馬快戰  
船運供億事久弊積公爲增修造之費定往來之期  
均其勞逸厚薄而人宜之時貂璫用事假名勢者匆  
午於道索舟動以百數公皆應之有方有二僧官歸  
自烏思藏迎活佛來索舟公詢之二人曰果有童子  
方九歲能道未然事然亦無大靈異且道路艱阻央  
難再往公乃激之曰誠如此言復命則善不爾吾當

爲轉奏汝坐欺妄罪事遂寢已卯寧藩作亂 武宗

駕幸畱都喬公叅贊機務凡事引公籌之曰我益友  
也陞署職方員外郎隨駕旗牌官輩例分守城門依  
勢騷擾公日爲點視錯綜其時中官有不服者正色  
折之以義八月駕回公已遷職渡軍非公事矣喬公  
曰非陸子不可公乃行處之如前陞車駕郎中嘉靖  
改元應詔陳言五事曰施實德以壯守衛曰均重徭  
以平勞逸曰增料價以造船隻曰買戰馬以實行伍  
曰徵夫銀以便民情俱蒙允聽陞直隸安慶府知府  
郡經宸濠之變毒于兵燹財竭民疲重以饑饉連歲

流殍紛然公至以撫綏爲首務尚簡易非捕巨猾吏  
卒不至鄉邑民甚便之而訟日減尤加意學校政假  
進諸生講說經史多所奮發歲甲申所屬大饑近者  
爲粥遠者給粟病者給藥全活者萬數盜發江中有  
指揮輕進爲賊所害公聞之大怒奮身擊楫一鼓擒  
之梟首于江干造佛郎機等器械增置戰哨船教閱  
民兵使熟於風濤於是皖兵可使公方訊囚堂上忽  
市中譁然報曰縣囚劫獄且直趨府來矣公顏色自  
若麾坐者列所訊囚拽於庭下徐捕逸賊皆獲益兩  
賊相通舍此趨彼則乘此跳梁兩不可禦於此見公  
之沉機應變也乙酉郡大旱公爲禁屠弛刑禱神不  
禱民間謂龍王神最靈遣官迎之則聞有巫者托神  
妄爲公詣神祝曰龍靈物也土木非龍也三日無雨  
則曝六日則焚六日無雨果焚之大雨如注禾乃登  
創立預備倉實米萬石改設雷港口巡檢司于花楊  
鎮巡歷招徠流民復業者不可勝計陞貴州按察副  
使奉勅整飭龍里等處兵備條陳四事於監司請爲  
轉奏一曰定折解以防侵尅之弊二曰定解官以防  
包攬之弊三曰明功次以明賞罰之典以宸濠之變  
安慶保障之功居多而江西南都官軍蒙賞獨厚故

云四曰議免賦以恤災傷之民都勻在萬山之中民夷雜處治者往往依俗處斷不全用法昔公季父健嘗僉憲於貴政有體要名聲赫然聞公命下凜凜相戒曰四明陸公來矣下車出令果慰所望有龍猴二場軍夷貿易常因是致亂公使巡捕官軍防壓剛暴者執之取死囚數人挫死於場衆爲悚然獨山同知蒙賊父子相讎殺六七年平浪王仲武與阿向爭官讎殺十數年年定王亞藤作亂餘黨尚存公至皆相率請降王景羅糾拽黑苗入寇公兼程馳至清平調兵圍之使人持檄諭以大義衆卽解去嘗行一山谷

中鼓角不鳴軍皆銜枚疾走公惟之左右對以謫神最靈人輒避不敢犯公毅然曰有是哉入而見其像繫令軍人持一像以行及下車軍且以像俯地呼而請罪公曰是何惑人之深也焚之無能爲妖使民墾荒上爲田引諸生而訓課之命衛屬入馳射而校閱之故夷風漸易而人可用陞四川布政司右叅政奉勅提督糧儲諸處倉庾遇近產米地方舟楫可通者自運本色其餘折色止解委官于附近產米處糴米上倉官民兩便陞廣西按察使尋陞江西布政司右布政使福建布政司左布政使以飛詭新增之田

補浮糧視糧多寡僉解戶而革貼解之費復十年出  
辦料額之法而民得安息戊戌述職京師冢宰松皋  
許公詢諸方岳以地方弊政公條陳數事一曰鹽法  
之弊二曰積穀之弊三曰寺田之弊四曰盜賊之弊  
許公採而上聞著爲令甲陞都察院右副都御史奉  
勅巡撫保定等府地方兼提督紫荆等關時有欲攘  
公位者囑巡關御史急奏邊警御史執不從竟假人  
奏之 天子聖明惟發旨促公上任謀者不遂士論  
深偉御史而量公不爲媚人事也旣任進屬僚而語  
之曰近時士風大壞以容悅承奉爲才能以小廉曲

謹爲清介倨傲執拘謂之剛方深刻峻厲謂之風采  
不惟負國且以敗名其相與戒懲之於是禁侈靡清  
侵冒處恤達官軍餉以時堅城深池除戎器備芻粟  
靡不究心殫慮益深懲恬嬉之弊將大振作而新之  
也 駕幸山陵公出鎮紫荆歷三關之險訓練守禦  
益嚴益慎遂得封贈三代奉勅建造沙河城經營規  
畫不遺力已亥正月 聖駕將南巡公倉卒經畫  
至忘寢食遂得疾奉 旨褒曰幹辦勤勞朕已知悉  
二月十六日 駕發京師明日公候于定興境上十  
八日駐蹕保定面見于行宮賜酒飯慰勞二十二日



駐蹕道

陪祭北岳二十五日駐蹕臨洺出所轄

境矣

至磁州朝候

駕發而回肌減骨立人有

不

者先是都護軍門及諸中貴皆有厚望有偶語

于馬前曰君記得送往迎來否公應曰記得更記得

節用愛人於是謫毀日行適御史胡守中奏處河南

撫按

波及落職歸里雖不得事其君得以五十

十之親不爲不幸也故初命而懼再命而

聞有所不足益承歡者八九月是冬母楊淑人

病卒明年碧洲公亦病卒公居憂于家歲壬寅沙河

城成論功復原職致仕年五十有五公偉姿山立而

氣度豁如不爲深刻不設崖畧而確然有不可動搖

者歟歷中外三十年所至必有爲國之功及民之澤

而廉約自持宦成之後田廬不長尺寸廢官家居與

其弟石泉君石溪方伯孝友兼至憫弟少石憲副蚤

世力撫其孤而教之檢族與僕常恐得罪於鄉黨作

文師外祖碧川尚書楊公精純顯白詩詞大雅不艱

深鈎棘如其爲人精熟吏事然未嘗挾以矜其僚屬

故至今仕路多感念之好積書涉獵集四方志錄其

廢典得失事成帙以自玩平生聞見亦積記之與世

人孳孳求田間舍百殊好也公德善縷縷不可盡述

唐別後錄 卷之六十二  
謹節其大與聞見之真者狀之以俟采錄云

巡撫遼東左副都御史劉公漳傳 實錄

巡撫遼東左副都御史劉漳陝西蘭州人正德丁丑  
進士歷戶兵二部主事累陞副都御史巡撫遼東以  
病在告嘉靖十九年八月卒未考滿以邊功得全給  
祭葬漳少穎敏居官廉直所在有聲戊戌遼東兵變  
漳遏亂賑饑全活甚衆後復平遺孽佟伏等遼人思  
其功祠之

巡撫河南都察院右副都御史傅凌川公鑰行

狀

王慎中

嘉靖十九年三月三日巡撫河南右副都御史傅公  
卒于官先是公故有疾欲去而以新受巡撫河南之  
命未敢言又不忍以疾故忘河南人之憂河南數歲  
饑人死者半矣而當輸漕粟三十萬石公乃具疏言  
河南人流徙餒死之狀請免輸賦一夕疏成而疾遂  
篤竟以不起 今上感公言切特貸河南粟三之一  
其二許民出銀以代粟河南人幸所由生相與呼號  
涕泣赴公之喪曰我乃從公得活而公固死耶按傅

氏有家於遼東之蓋州者莫知始所以徙本出漢北也義陽侯介子之後也其始爲廣寧人者則公之曾祖諱恭讓也恭讓生祥祥生景景娶唐氏以貴贈禮科給事中唐氏爲孺人唐氏故嘗爲贈給事公置孫氏以貳室事孫氏公所自出也公舉正德六年進士召試授禮科給事中存職屢言時事皆詳於大計而略於細務得告君之體其最著者論邊事一疏至爲故兵部尚書王公瓊所讓曰吾不能言也其大指言今法邊將臨敵士卒十人以上以坐其將將畏坐法率不敢見虜欲以求免士卒虜無所畏得以暴苦

民宜制自今虜入境能率所郡卒格虜者雖亾千人以上勿問有功者仍錄其功其不敢見虜者卽不口一人猶坐之上允其言著爲典以行於邊八年寇入宣大二邊將領亾卒甚多邊臣以聞廷議遣給事中一員往覆視之以屬公上可之曰是嘗言邊事者至鎮考治甄別不隨不苛竟得其實以報而副總兵劉淮者嘗格虜有功亡卒亦稱而公向所論業者于典得免坐遭母唐氏之喪解職十一年復除禮科給事中十四年遷工科右給事中未幾出知太平府始至延見郡中士大夫父老攷問風俗以興學教人

爲首務太平負山阻江多沃土士鮮向學公選諸子弟之秀者延師教之親爲考校文義前此士之不薦于鄉者數矣自公爲之科未嘗乏也俗好賽神所費不訾公諭之曰何不以此克爾徭費之輸而以其餘養父母育妻子而爲此糜爛也不改吾且刑爾俗以頓息郡中大旱公以身爲民請命於神一禱而雨其治獄不事鈎摘而常得人之情隣郡有巨獄不受其郡所治惟願得得一言部使者輒移公治之莫不稱平而解也嘉靖壬午大饑公在郡久毫髮無所私財粟溢於庾庫又以恩信貸民之富者使出財粟以佐官給散有法饑者與之粟饑而未濱於死者與之財皆得食而去太平雖饑而人不死者由公力也郡旣不饑而隣郡民不得食者咸流入太平境內或欲拒之公曰何非人也而忍視其死顧吾力有以及之乃以餘粟爲粥於野以賑之所活甚衆在郡四年部使者撫臣相繼以公賢薦于上章十數上也乃拜浙江按察司巡海副使緣海所設守禦衛所將卒姦剽繁鉅不可究詰本以錯列大島風濤之所鼓盪副使惡險不能至也公固遼東人習見海自乘巨艦擐弓矢出入風濤中無險不至摘伏挾隱懲怠勞動爲中

立條法於是在存肅慄若家置一副使所捕得賊級甚多其脩置戰船收給月糧之法出公精思已著爲令行於浙至今守之以毋孫氏之喪解職壬辰起復授河南副使專備信陽州兵事信陽固盜藪將卒姦利視浙直山海異勢耳公所以爲信陽綏拊擊斷與浙直異其能收附軍民多得賊如在浙時君未久陞山西按察使以去用法平恕不事操切而專持大體富民某某坐殺人當死獄成矣後以貨免公收鞠之竟寘于法主簿某知縣某皆好官以忤當道意爲奸人所構事下按察司或謂公是當道所欲入宜切與之爭公曰法如此惡以人意出入竟白之一歲中

四川布政司右布政使而以巡撫王都御史杖宗室子事連罪左授河南叅議遷河南副使再遷江西叅政益公於河南久矣有德於民甚深其赴江西也軍民數千人擁輿抱膝不得行慰諭久之乃得行由江西遷福建右布政使尋拜河南左布政使至之日河南軍民加額相告曰是固吾向所畱不欲使去者今果爲吾來耶未幾巡撫河南都御史缺廷議以河南荐罹大災必得寬大廉醇如公者以綏定之遂以昇公然公自爲江西時以夏日觸熱救民之荒跋履山

谷爲暑所中感痰疾幾不起矣僅而能起猶綿綿也  
故其蒞河南不能久而遽捐吏民公雅以孝聞居家  
家人未嘗見其疾言遽色門內雍雍肅敬諸子待不  
威而嚴僮僕訢訢如也其約身謹行之效類如此居  
常循循恬簡不以材智先人然與公游者莫不敬讓  
之其斷獄每傳輕文不以得情爲喜與人交溫溫若  
恐不得當其意待下好掩其惡而揚其美衆人皆樂  
其長厚至於利誘勢怵則屹然山立不可動也居外  
二十年不以書干中朝貴人頽然自守而已由河南  
副使擢江西叅政以至爲都御史於河南僅二年而  
四遷本出太宰靈寶許公所知太宰故爲左轄於浙  
江與公同列知公特深然公始終未有一言於許公  
也公諱鑰字希準別號凌川生於成化壬寅九月五  
日距卒享年五十有九

廵撫遼東右副都御史成文傳

實錄

廵撫遼東右副都御史成文山山西山陰縣人弘治壬戌進士授知縣擢監察御史廵按蘇松遇歲饑條上便宜民賴全活復按陝西劾奏鎮守太監宋彬冒首功且言內外大臣朋肆欺妄力觸權奸逮詔獄爲民上卽位起知鳳翔府累陞至今官上疏乞骸骨至嘉靖十九年八月卒賜祭葬如例



延綏巡撫都察院右副都御史五谿萬公潮墓

碑

五谿萬公進賢人諱潮字汝信官至延綏巡撫右副  
都御史嘉靖壬寅言官論邊事公亦以風土弗宜疏  
調行至宜君縣以疾卒則癸卯正月四日也距其生  
弘治戊申享年五十有六往丁卯舉於鄉虛齋蔡  
先生以奇才許公辛未魁禮闈陽明王公頗以不能  
首薦爲恨二公固一時所謂有道君子也而五谿咸  
得其賞識如此其才豈不出夷等哉始推官寧國治  
寃獄有聲又兼理芻郡疑獄撫按廉其能薦之擢禮

部儀制主事巳卯 武廟南巡抗疏止輦杖瀕死爲  
民遂菴楊公賦詩所謂西江四君子公其一也 今  
上卽位錄正德間言事者得復職歷職方郎中以學  
行推浙江提學僉事士各有造巡按潘公薦之有學  
覲聖賢之奧才兼儒吏之全等語乃擢副使仍督學  
士之先後中式皆公所素品題者時咸服其知人乙  
酉戊子二試所爲程文多出其手士大夫見之曰必  
五谿能爲此旣擢叅政以提學時曾忤其鄉之權貴  
人遂左調廣西尋擢按察使甲午擢陝西右布政使  
丙申轉廣西左使所歷有治效撫按又首薦之尋以  
內艱去服闋補陝西左使適兵荒竝至民苦之公綏  
懷經理陝賴以安巡撫趙公尹公先後以治狀薦于  
朝遂擢右副都御史巡撫延綏公至鎮下令恤軍士  
飭堡堠募勇敢補卒伍墾邊地足兵儲民樂爲用虜  
且知警而公竟以調去齋志以歿何也豈造物者豐  
之名而故靳其年耶古人有言畫方畫圓勢難兩全  
令名之與壽考其果可兩全者耶當公之抗言被杖  
時自分必死旣得不死又切自喜幸出望外况復思  
起廢于朝有祿秩其後爲提學時又以不阿忤權貴  
人夫權貴人薰灼焦金石卽以公降謫轉涉顛沛而

困抑之若狄山劉元城之爲奚不可也公幸而左調以有今位功在生民名流青簡天下後世其誰不謂五谿公爲名節之君子彰彰有聞者哉夫能得不死與左調而後有顯陟重名於時造物者於公薄耶非耶嗚呼公亦可以瞑目矣公孝友天性有心學歷官三十餘年淡素若儒生平居無長言惟成就後學則講談經義不倦諸所行事類此

嘉議大夫都察院右副都御史百山車公純墓

志銘

張時徹

余昔者蓋侍百山公於楚也習見公器宇莊凝志意夷曠浮遊埃壘之表不棘棘津途徼取尺寸之獲也乃其爲政務持大體秉於典憲弗纖纖細苛每言事率稱引天下長者恒退而心語曰高人哉旣以不咸於世納祿歸耕如釋重錮蓋灑然樂也久之余爲媚者所擯過公里第則迎謂曰公歸乎公歸乎他無足問歸卽可矣此其言豈縻於寵祿者耶公之歸也勅斷家事無戶外之蹤無尺書之訊收精內視施施乎

清都少室之遊也余嘗曰不丹而仙不石而固其在斯入也而溘焉以逝斯又何耶先其期自刻亡日一無所爽猶之乎仙也乃遺令屬其孫曰銘我者必以張公夫人既厭棄人間世矣而又何有於銘且知公者不爲不多矣而又何有於不佞斯其旨可異矣按狀公姓車氏名純字秉文越之上虞人世居百樓山之麓故號百山其先丁五季之亂自太原石州徙台之黃巖至泰一府君謨自黃巖徙上虞於是上虞乃有車氏十一傳而生勿是爲公曾祖爲政和丞攝縣事時盜礦者推其魁以五百金饋丞祈緩詰捕丞峻却之偵其徒方張遂投劾以歸未幾果不靖蹂躪境土陷城屠吏而公已翛然林下矣勿生贈雲南叅政克高克高生贈工部郎中加贈雲南叅政廷器則公父也配贈太淑人某氏生公頴敏卓犖儀度不凡弱冠補邑庠弟子員戰藝屢誦乃下帷發憤博綜經史冥心玄悟遂以易學爲時宗執經問業者遠近踵至率精藝文舉秀儁彬彬有稱矣正德乙亥憲學徐公蕃手公文異而廩之丙子領鄉薦丁丑舉南宮第十三人觀政兵部得賜覲省至家適丁外艱廬於墓側就而請業者數十人誦說先王諄諄以忠孝大節相

厲諸生咸欽嚮焉服闋赴銓授工部屯田司主事時  
潞河圯洩病漕捧檄往治之費省而事集司空尚書  
章公上其功旌勞焉進都水司員外郎丁內艱起補  
營繕隨奉貴陽採木之役事竣被白金文綺之賜當  
是時有千戶黃榮者挾權嗜索賂弗與聲言欲譎計  
中傷之未發而榮則暴死人以爲天庇善人也居無  
何大禮議起永嘉張公過公邸舍要之爲助公持不  
可竟以廷諍杖闕下濱于殆弗悔也畱滯郎署者久  
之乃擢山西布政使司叅議分守大同大同故扼胡  
而險時戍卒稱亂虜薄近郊洶洶危矣公轉餉調兵  
多方經略文武大吏倚如長城因著備邊論若干篇  
談兵者以爲著蔡云時歲侵民饑公發邊儲賑之而  
處補其闕蘇活無筭撫按以最績上晉雲南按察司  
副使備兵曲靖剔宿蠹討軍實戎政肅然上官霑益  
州守龍氏與烏撒衛陳崇揮治兵交攻公爲平之各  
帖服而寢交南弗靖 上遣重臣毛公伯溫往問其  
罪增設叅政一員理餉事推擇得公軍興賴以不乏  
交平乃罷時大理張知府者黷貨虐民巡撫汪公文  
盛檄公按治得實暮懷一明珠以饋而求緩其獄公  
斥遣之竟正其罪時 上新定郊祀凡外臣三品皆

得誥封三代公與焉晉福建右布政使未幾轉左凡  
三載操執潔清民多作謠頌歌之閩故多山田賦鮮  
寡不克於用乃檄諸郡縣凡寺觀費產質佔于豪右  
者覈實名賣責其直以佐公家之急雖併兼不憚嘖  
有煩言然亦莫能螫也晉都察院右副都御史巡撫  
湖廣兼贊理軍務便道過家上隴故事士友凡先顯  
者歸自宦所率携土宜相問勞公乃出橐中書若干  
種致學宮聽友人取而誦之友人曰多子哉孰贈遺  
有踰此者乎比開府於楚中勅令列科條厲官箴剔  
吏弊輕徭賦省刑罰汰煩費理滯獄承前政操切之

後一以博大行之往撫院舍中供成有司及驛官辦  
具恒過侈腆一切損減服素茹淡蕭然布衣也與諸  
司處率朴外坦中不作城府曰凡吾所與共事者也  
若亢以絕物人將狙詭相釣何益哉時辰沅苗亂  
上命治齋范公相機勦撫公與之協謀底定爰被寵  
錫既以方域多虞時政有未可者遂有明農之志上  
書闕下曰臣駑鈍無狀待罪茲土罔所短長慙負高  
厚莫可溥雪又不幸被狗馬之疾眠食視聽改其常  
度恐益增曠闕犯詩人韜梁之譏死且不贖願賜骸  
骨歸正首丘避賢者路凡三疏不允巡按伊君敏生

代奏上言曰都御史果病矣其歸近醫藥痊日有司以聞朕將徵馬時候代未行會楚世子弒其父端王變起倉卒闔城欲竄公鎮以靜定衆乃不騷已而朝命親信重臣與法司大吏往勘執其罪人及詭詞庇逆者正之刑誅而定其府事皆公所處分也已而有誣公懼禍圖免者公弗與辯曰身將隱矣焉用文之瀕行士民遮道挽留車不得前所攜惟圖書數篋衆噴噴歎曰是都御史裝耶居官十一任凡涉四十年清操如一日不一語及生產事歸田二十餘稔閉門却掃焚香燕坐或把書臥而誦之已乃齟齬睡矣客

至哢憤迎咲劇談天下事卽方輿險夷邊關阨塞人情世故臧否得失疊疊不竭也或談人過惡則頰首不答有告以不平從容辟曉之多所舒解公庭中未嘗濫投一刺雖里中一不輕出居常以孝弟訓子孫恒舉政和公却金免禍事爲言曰我今有今日得無念爾祖之貽乎隆慶戊辰六月六日步履戶庭忽仆於地掖之就寢無苦越月謂侍者曰吾啖粥尚可八十盂計至九月二十七日粥當止矣吾其歸乎至其夕果卒距生成化十六年七月二十八日享年八十有九平生奏疏若詩文有百山集解組稿若干卷藏

於家

中丞丘公養浩傳

王慎中

嗚呼功之難立名之難成豈獨生才之難哉時變之  
隆汗而趨背異其得失人情之好惡而忤合乖於愛  
憎因時者其事便而見爲尚通矯之則足以尊已而  
鮮濟於時忤衆者其名高而見爲寡偶徇之則足以  
同物而不嚴於衆夫其受材之稟旣專致用之宜各  
適亦足以事副其功業載其名而時變人情之難一  
如彼故有智力足以因時而固矯之以求濟趨好足  
以同物而不忍徇焉以取嚴宜其收兩得之功博兼  
獲之名而猶不免於違時之咎憎衆之謗此魁磊閎



達之士所以常悼恨於功名之難也中丞丘集齋公  
名養浩字以義由易經起家爲進士值今天子新  
卽位盡更正德以來弊政士大夫興慕風采爭欲爲  
材公於其時自視不獨在同輩上直以古人爲不足  
爲也賜第未久卽授牒知浙之餘姚縣餘姚於浙東  
西爲最劇公爲之績業奮起日升月長賢名四出無  
足而馳疆聞壤望或愧志不及或傳講以相師勵不  
知丘餘姚爲何如人大江以南部使者撫臣相語炙  
口至倡以激其部邑士大夫行過浙東西訪爲吏之  
美者於其上必聞餘姚之名他令森立踊企非不見  
爲賢皆掩於公聲翔於朝遲以爲法從考滿召爲試  
御史閱數月真拜方廷中清明侍從皆極一時之選  
公居其間如楚之在薪同臺多自以爲不如令下當  
議事倚待決公必得聞雖入臺後而預政與宿舊臺  
僚等大夫中丞咨訪有加焉公卿多欲致公與相締  
投雅公汎如也不適爲奸與雅者尤愛而憚之時方  
清明而當柄大臣進退危疑繫國是得失士心趨向  
已潛有移奪化蘭爲蕭幾在忽焉公獨早覺不失足  
他徒羣公中有憂國掄世持衡於消長之際冀以負  
爲勝倚助臺中明於得失如公曉然不移者可一二

數凜凜乎有寡助之歎公亦以母喪去職比起服入臺枋臣改置國更其是公瞿然內憂端居深念未有所發而公未憂去時嘗首論議禮大臣再論宦侍又論戚畹當事者忌其然不欲令久處臺中公故有文名會南畿督學憲臣缺卽奏以公往公亦樂得其事謹條教考藝文專意於作人興學自是不復與臺論矣反終父喪再入臺臺僚多變易宿舊少存者因默自悲欲乞外而臺資已高於格不得外授上方蒐討古文建典禮於成周之上營立九廟務極曼碩以稱嚴祀制璽書畀公董視其役久之資益高遷拜

南京大理寺丞蓋公在臺其去來遠近之跡淹十五年通其入仕之日殆二十餘年人且暮望以爲公卿公尤雅意本朝以天下善類消長爲計其口誦心存未嘗一日不在於海內排擯放廢之名流惟恐其老死而不叙收甚於已之失位而咋舌決齒於怙權妨賢之夫如不欲與共立每一縱言目光橫射意氣捷出傍聽激竦頗以此取嫉特以前後所領職皆有制書專事視學董役有以黽竭自効得不以極言克責意氣雖過而怨怒未集知之者則信其果有志於世也爲中丞巡撫西蜀則以權當其力欲變一時偷安

之風官司相蔽給以具文而慮不及職持三尺法爲市苟娛大室要津交以自肥而瘠民公惡之若仇又能窮其微暖穴竇關節探室解剝無毫髮遁失汚吏猾豪營搆巧秘徂伏鬼倏見摘皆驚謂神山谷遐深砦硯昧阻冤苦疾痛舉在目前戶行家到未喻其悉其所長如是諸司旣已逆爲公折詘公尤思震動恐聳之警其視聽而新其氣以作起功庸然後與爲寬碩以樂其成非專以察斷爲嚴而愛不濟者也蜀人已害其不可動而公在西未久功名迅發精采先於諸略

江西撫臣張淨峰公擢總制兩廣勦論以張

公名臣難其繼移公往代於是忌者始側目思中公而害者以流語乘間潛行公亦抗章求退以避之蓋公在蜀其意未究其治未終而徒見爲多威以宋張乖厓田元均之賢治蜀寬猛不同未聞論者優田劣張然張易嚴以寬必在民信之後而比民之信非前後八年不可雖其自言亦曰只一信字五年方得成公爲蜀未期日月淺其所能變動者精采氣勢之間耳然以武侯論治次第求之則法行在恩加之首而知榮乃限定之餘公所施爲正不爲悖而獨執未究之意以訾偏據不終之治以疵猛是使仲尼子產未

終三年而且用以得殺也習苟且養交私上下相玩之時不愛出力一矯之疾雷破蟄享昭蘇之快自是瑰偉絕特不愧道說又不當論其究不究也公濶達恢廓如無所擇而簡別精密細入曲折具有條理憂時憤事殆不可堪而器貌敦博無小丈夫悻悻之陋爲文不規規古法才馳氣駕姿態俊發有以踰人晚善爲詩歌藻澤腴贍聲韻平妥篇出皆可誦也其最長在奏對移駁之文指畫利病摘抉情僞元本法令緣飾以典訓使躬受者警服側聆者省畏天性篤於內行甚修事父孝謹有對則立有諫則跪不以旣貴少有所懈事兄如父撫弟如子一門之內肅敬而和雍如也入室燕笑有則與夫人相敬不爲嫚寢無飾容侍御之人其不適於色非情溺焉而矯爲制者於族嫻厚有用情之過至以蒙謫而人知其仁之所存也今仕者往往毀其土之惡以自明所難公在餘姚深言其君子達理可與慮善其小人明法而易以去非比入朝縣之士民至京師者必見公問起居安否何如曰吾賢父母也久而益篤其在土者飲食必尸祝公彌嚴於爲縣時後令至未有所爲民輒相語曰得如丘公無按山海關所薦士皆由伍中拔起爲名

將而論留馬永一疏尤有烈士之風在蜀以薦何卿  
被言者所巉然天下皆知公之言當也其在臺大獄  
起故相永嘉張公來視臺事巧者皆曲意媚之以求  
進用公與張公同年才名又張公所欲收嘗語公得  
君與我閱稿獄事濟矣公遜謝不能而已張公滋不  
悅公卒以憂去免已而附麗之者多至大官公還臺  
視之漠如公嘗以言事一謫推官旋蒙召復一下詔  
獄未幾得釋而意氣不少挫嗚呼可謂明於大義尚  
風節偉丈夫也始公受命赴蜀寓書於余有不俎豆  
張忠定之側非夫之語觀其詞旨感淬將在前修林

見素彭幸菴胡靜菴諸名卿頡頏之列單車入棧志

意慷慨有叱馭過坂之心何其壯也今其風烈雖著  
而緒業不竟談頌方顯而謗懟參半又可悲夫公歿  
余哭之哀其子維楨出公篋中故書予檢數十札皆  
京師貴人所與公札中疊疊皆美詞余謂維楨曰此  
皆不足爲尊公重獨趙太史貞吉一札寂寞數語有  
云僕嘗揚言于人人使蜀中得借留集齋三年百姓  
瘳矣斯言僕與公皆可無愧也此札所言宜使當世  
知言之君子共記之耳維楨謹藏而錄之公葬太史  
孫季泉公狀其事而半洲蔡司馬公銘其藏余於公

最雅故獨論其意而傳之而狀銘所載皆不復出也

嘉議大夫都察院左副都御史東阜劉公大諱

神道碑

王崇慶

公諱大謨遠夫其字東阜其別號也河南儀封人高祖文整曾祖海俱業農不仕祖澄陝西苑馬寺清平苑園長父愷山西黎城縣學教諭後以公貴封監察御史贈都察院右僉都御史母扈氏封孺人贈恭人公明亮豁如髫年入邑庠卽淬礪志節刻苦學問一時豪俊未之或先弘治戊子薦於鄉正德戊辰登進士初授戶部廣西司主事督收黃花鎮古北口清江浦諸地糧芻是時逆瑾擅權扇虐朝士凡行役往還

皆趨候伏謁冀免禍者公 陛辭卽出國門士論高  
之庚午改廣東道監察御史蓋自是風裁播中外矣  
辛未上疏勸學興政壬申巡按遼東陳三事皆有關  
政體時太監岑章肆毒遼陽公廉知卽捕其左右用  
事者悉置之法章惶懼至誣讎以他事逮繫詣獄遼  
士民奔走泣送先後相望於道癸酉謫陝西隆德典  
史旋量移蒲城知縣旣至蒲日惟行所當務蒲民頌  
德有碑在焉丁丑晉同知鳳陽府會大水公以檄委  
賑濟多所全活戊寅晉浙江僉事首葺菜戶於私衙  
旣而分巡金衢時宸濠構變乃勒兵常山先聲四達

兩浙賴以弗恐辛巳

今上御宇入賀萬壽晉陝西

按察副使時總戎李隆者謀殺都御史許公銘事久  
未決當路以屬公竟正諸法輿論快之癸未晉四川  
左叅政分守川南川東二道值番夷爲亂公督師征  
勦擒其元惡全蜀以寧事聞有銀幣之賜乙酉會四  
川鄉試克提調官作興之盛倍昔丙戌春罹母憂戊  
子免喪北上時三晉大饑公以才望素隆超拜都察  
院右僉都御史提督鴈門撫綏山右卽上疏請出內  
帑溥賑 上可其奏遣官齎銀五萬人晉陽時方旱  
公巡歷所至問民疾苦兼禱請旋復雨民大悅會有

議撤備關官軍者公抗疏止之先是公之父黎城翁垂白在堂嘗乞終養不報既而糾劾叅議魏倫忤重臣意遂得致仕或勸公辯者公笑曰老父在里乃今得遂侍養吾又何求况暇辯哉既歸與黎城翁怡愉終日每風和日晴卽約朋舊登高眺遠觴詠爲樂若將終身焉者自己丑至己亥數年餘南北大臣臺諫及撫按多所論薦由是再起巡撫川中其宣布朝廷德意獎拔廉平洗刷垢弊凡地方事宜罔不經理精密至於曠臘逼邇北虜堡屯曠遠舊設指揮防禦公謂其未足以震懾之也具奏乞設守備施州地界川

胡夷多肆行劫掠亦欲添設叅將疏入 上俱允

寅奉勅諭條五事以安邊禦虜又皆積有成效今川人固有能述之者公撫蜀凡四年澤被威宣銓部屢擬入佐院事竝總督糧儲戶侍官僚皆未之授蓋廟建以材木爲急而川中固採辦地也由是欲久任公是時例當給由公父母暨妻皆荷封贈癸卯大木告完大司空奏薦公資望獨深勞績爲最遂晉左副都御史撫川中兼賜銀幣公自馳驅間關因感瘴癘邁疾卒於官享年僅六十有八所著有東臯集若干卷藏於家三蜀兩遊稿已先梓行公之亾也臺臣上其



功蒙恩賜葬祭如制四方門而榮之蔭其子文爲國  
子生

通議大夫巡撫山東右都御史婁公志德行狀

俞時

婁公諱志德字存仁勿齋其號也上世唐師德之後  
居汴之懷慶徙通許大父良舉進士累官都御史曾  
大父大用永樂時始徙項生榮榮生敬敬生春爲公  
大父春生信爲公父統歷贈通議大夫咸以公貴云  
公生而穎異向學十七丁父艱哀毀骨立斂舍如禮  
侍厥母太淑人戴委委焉惟母志爲頗里舍人以孝  
名二十補邑學生縣尹任廷傑爲舉婚媾逮秋登省  
薦越明年爲正德戊辰居母憂盡哀掩廬授徒非聖

學不講少司馬張老居間遇初度納賀公適後來張少焉遂加譙讓僉皆茹憤公獨于于也張迺慙君子服其雅度丁丑第進士以制刺真定之趙州如未如藥嘗酌水以自堅大司徒孫公稱曰古循吏也撫按連疏薦之今 皇帝御極入覲遂留副戶部山東司郎署諸郎署缺悉妥以攝晉陝西司正郎會北虜寇邊邊儲告匱公以大司馬金公奏命往甘肅督理出納忽微奇羨輒舍以舒民三年而士馬強公有功焉總制遂菴楊公京山 公幸菴彭公歎曰邊政得人如婁無患也會詔還銓管以浙之杭州爲東南要郡

大司馬靜菴胡公杭人也知公深遂請以公之杭杭事繁而民詭諸臺院藩臬臨之往來大夫士無問晝夜流連湖山之遊各供頓無算公至以民隱爲政樞一時贊毀殿最罔動也屬邑海寧多海患公親視之爲築石塘防焉民用救寧杭水窟災沴錯出公竭虔禱雨輒雨禱晴輒晴杭民歌之會壬辰入朝公僅一身一吏囊無片帛京之諸當道彌益賢之迺甲午夏補福建鹽運司使行之日裝蕭然如始來乃晉浙藩叅政閩商人思之爲建祠勒碑志公廉也興化之上里離場也竈戶人陳瓊生輩以按者將及罪公念海

物淋漓易耗乃白而得釋過上里顧分署歲久頽唐  
憂焉場大使刁翀言曰瓊生等欲報公莫由也遂各  
輸財鳩工一新之御史包蒙泉氏知公深凡所咨白  
輒嘉獎行之比復命登武夷指九曲泉謂藩臬諸公  
曰此水之清似婁運使矣公每語厥子曰吾受知于  
包使君不能報但不敢孤爾汝曹念之至浙而民喜  
曰舊恩主來也以賀 皇太子入京諸朝紳喜焉宗  
伯霍公延公茶命去其果曰勿使撓公清也公于浙  
會計督徵以時國賦民望兩便之處州舉人盧誣構  
大獄藩使孫公臬使張公悉被逮 天子勅給舍執

兩浙  
賦役  
成規

金吾勸焉至則屬之公盡得其姦狀而諸公之枉以  
白晉是省右布政使杭歲大侵諸公應之不勝慘急  
兩臺下之議公擬以減餽遺罷宴會爲急或撼之曰  
不爲動而臺史氏咸敬納云旣出僚吏謝曰公之言  
兩浙福也復以臺檄劑量賦役釐爲十卷名曰兩浙  
賦役成規民甚服焉癸卯夏晉福建左布政使至閩  
閩人慶曰福星來也不數月而八郡稱安迺晉南京  
太僕卿繼晉太常卿蓋優公績也而 天子再下令  
廷臣舉山東巡撫僉以公應 天子曰都亟賜璽書  
往焉越明年丙午春公將發畱都忽痰火作遂不起

蓋二月六日也去公生成化己亥十一月二十六日  
享年六十有六云公性介潔不蓄媵婢分外不內人  
毛髮明發謁家廟節且必朝服望闕拜不厚治室廬  
田畝出入或馬而徒不阜不輿割俸周族之昏喪不  
交涉公事歷仕三十餘年無毀節大叅蔣公淦語人  
曰海內如婁公清望是吾人範也有題大梁包公祠  
壁曰昨日包公今日婁公其爲人所歸服如此

嘉議大夫都察院右副都御史九川呂公經墓

表

韓邦奇

九川公飲恨而卒其友朝邑韓苑洛發其隱撫其大  
及取名士潘子高之論痛哭流涕長大息表其墓曰  
書曰善降祥又曰天難諶公關中卽俊卽宅之賢也  
懷安攘之志抱忠亮之節蘊貞懿之學秉廉介之操  
中遭震撼放遺終身道遠而位促光已輝而不續志  
士至今傷之公之撫遼陽也清屯田裁冗役嚴號令  
禁奸宄按豪雄料丁力將築邊墉以遏虜寇一二兇  
魁弄權將必當大法惑衆倡亂而公危矣初公左右

政起復入京故事必先補原職而後除遷之先相以公國士也不可以常調拘陞副都御史巡撫遼東及變上近貴先相故大怨誤以公爲先相與因欲罪之憲使者又不爲公申有詔收繫公詔獄使者至遼陽諸兇并使者笞辱之林侍郎廷昂奉勅勘公事諸兇閉之憲使者出帑金大賚乃啓門且撫慰諸兇謂公必重坐蓋圖悅諸兇心隱其械詔使寤侍郎弗以聞而公果重坐遠戍憲使者以平定論功超遷矣公平生建立如何而枉罹橫尤若此也天邪果難諶邪然公議無泯時士林扼腕歎息位能禡而名弗損身雖屈而道則亨後公之嗣子光于科甲顯于庠序繩繩未艾擠公者今安在也天難諶邪非邪公今已矣傳於史則罪也功也是邪非邪嗚呼可以徵矣吾友潘子高曰正德間閹宦武夫相繼盜弄國柄生殺予奪順指氣使當其時勢摧威劫中外風靡士大夫依阿恣泆以保身全妻子鮮有能立者公於時明目張膽數侃侃論天下事不置建儲保治諸疏讀之凜凜使人毛髮竦立疾風勁草狂瀾砥柱公之謂與大同數逆而失處諸鎮効尤焉爲政者往往務爲姑息不敢下一令申一法遂使狂狡之卒待釁而動養患貽戚

至今未已也公以身任其事務改弦而更張之天若  
厭禍公得大行其道豈惟遼左永清卽大同諸鎮亦  
當警懾知有朝廷矣乃志未就而變卽作獨使公一  
人當之豈非天哉語有曰非常之元黎民懼焉及臻  
厥成天下宴如也人徒見公受禍之慘而未覩宴如  
之効乃弁大同諸鎮事置不講藩鎮之監其不遠也  
已有志于天下者其無忽諸此乃公之隱而且大者  
也吾恐後世莫察其情故表而出之公之子南京刑  
部郎中顯再拜泣血登之石若公之詳載之誌銘不  
具書公諱經字道夫號九川姓呂氏陝西慶陽府寧  
州人也起家進士授禮科給事中調山西蒲州同知  
詔起山東布政司左叅政歷按察使左右布政陞都  
察院右副都御史公生於成化丙申十二月初八日  
卒於嘉靖甲辰十一月十五日享年六十九歲云

都察院右副都御史葉公照墓志銘

張堯年

寅齋葉公以都察院右副都御史引疾致仕歸于東  
溪里第越十有八年卒其孤坤等詣予徵銘按狀公  
諱照字景暘寅齋其別號也宋水心先生之後公生  
而穎敏性喜寧寂七歲就塾十歲能屬文年十五師  
事錢存誠先生大奇其才益思奮迅惟兀坐小樓殫  
力誦讀中庭張戲未嘗踰闕外一注目年十八領鄉  
薦始歸娶萃恭人二上春官不偶旦夕持簡編恂恂  
儒生絕不濡迹遊晏郡太守聞其名爲延致師塾課

其徒惟講劇經傳及與守言絕無一語及外事其端  
方介特益所操執者素矣嘉靖癸未登進士授石埭  
知縣虛心極慮日求民所便利而布之罪人所決遣  
皆自以不寬家人攻苦茹淡儉約如布素吏民畏懷  
以才調補新建邑會城最號煩劇公區畫裁剗咸中  
倫度案無畱牘獄無滯囚朞年以最聞徵貴州道  
監察御史秉公持正不事矯激不務阿比嘗巡廬鳳  
等處再巡河南及查部院錢糧務舉大綱不過苛察  
揚州高鳳賊濫事覺諸貴人曲爲祈免竟繩之以法  
布政使邊某憑藉恣睢奏罷之風裁峻卓比還總諸

道奏牘刷諸司文卷尚體要抉剔隱蠹人憚其嚴  
午陞廣東副使巡視海道廣東番舶奸商多竄入島  
夷爲市公嚴下海之罰申互市之禁海道肅清未嘗  
摻珍奇以餽朝貴久之陞廣西右叅政按察司右布  
政使公撫恤疲甿振綱而略節其意主于寬仁而力  
制權豪大忤靖江府於法無少假安南叛亂時議興  
師經略綜治卒致戡定公協贊之力居多癸卯陞山  
東左布政使京東鉅藩地切事殷及秋有防禦之師  
給餉輓運事多取辦又出于常輸之外公多方規畫  
必求克濟諸所出納徵派親自勾稽約以期會頃刻



不爽嚴禁官吏那移加耗之弊民皆感恩會巡按御史鄭芸索夫直百名公第以百夫應之用拂其意百方媒孽至公守身大節嚼然不緇卒無少訾云丙午陞都察院右副都御史撫治鄖陽諸府三省流民以萬計易動難安公鎮以廉靖民狎于野來歸者益倍于舊念副使公張恭人年老引疾乞歸上疏陳情詞甚懇惻乃始得請歸承色養餘一年居副使張恭人喪哀痛過甚凡衣衾棺槨期于誠信不爲彌文因舊廬稍加緝治無所增創分二子用不及百畝服食儉素蕭然寒士飭子弟童僕勿生事以擾鄉里及卒

無餘貲遺命斂不用錦綺喪不用鼓吹葬不得踰月蓋清儉之德終始不變云所著有江北題藁中州奏議東方政議鄖臺奏議用拙藁羹牆錄溝盈集藏于

家

前副都御史孫清愍公繼魯墓志銘

徐 棡

公諱繼魯字道甫號松山其先浙之錢塘人高祖維賢以太學生言事謫戍雲南右衛遂家焉南中孫氏自賢始賢娶趙氏生子瑗瑗生鐸鐸生子三祥禴禧禧生數子其一則公也公生弘治戊午七月初一日甫弱冠通書史已卯舉于鄉登癸未姚涑榜進士出知湖廣澧州因事改國子助教以經學著歷戶部員外郎中監運通州大著水槩聲尋擢守衛輝一以公廉惠愛爲亟會歲多蝗復大旱公竭誠禱于天蝗害

除大雨隨應民以爲神當路特薦調知淮安府衛民祠之碑之公守淮政成化孚境內亦邁旱公禱之又輒應民間每晨焚香尸祝之士曰我師民曰我父有紀愛錄載政績爲甚詳無何中官奉命織造江南道經淮大作威福公抗阻之于是構疏于朝械逮京師賴執政夏公桂洲之力獲解公弗謝然而所遇非霍諂也竟以此忤時立禍本矣調知貴州之黎平黎苗境也公宣猷敷德不鄙夷之苗亦格心靖州叅將歎曰當時選邊將獎率萬兵守備諸邊莫若選廉吏一人足矣會庚子歲大比士公執事外簾號私侍人

名聿振擢湖廣提學副使楚地稱極廣而材亦因其地督學者恒苦其艱公甫歲之半遍校焉士方以得師爲幸擢山西左叅政分守薊南強藩斂戢嗣陞山西按察使士民擁馬綢繆不能去乃宗藩百餘以其持法銜之謀挾焉解其裝淮敝衣履無私積衆憫曰我高皇祖登位迄今百七十餘年罕見此官仍載酒追于郊至晉持法益堅凡王府獷暴弗靖悉寘之法弗貸時兩臺交薦之至謂百姓有孫青天之謠樂其久任而惟恐其去雖宗藩亦以豐其祿崇其官仍其司請乃擢陝西右布政使會丙午歲復大比士與

公選者卓有聲稱自是爲先帝眷注晉秩提督鴈門等關兼巡撫山西右副都御史一時文經武緯于安攘大計卽承肩之會有西陲之事持論與總督東涯翁公不合公先爲文數百言誓于神慷慨忠義之氣溢于言表及封事與總督公交上而執政者故先翁而後孫竟被誣下錦衣獄先是陝西侍御楊公爵者以言事在獄中無楮具取破碗書壁倡和百餘首命曰破碗集中有云爲國爲民意已深諫章一上淚沾襟男兒至死心無愧置取芳名播古今等說楊公解之至謂勸君努力加餐飯浩蕩乾坤在兩肩以是作遠期而知公者率百口直之山西有宗藩者抗疏救辯卽前解裝肆挾者也公方讀易獄中進退存亡付之一編而執政者併之不已先帝之明將宥公矣而天道難知疽發于頃遂卒實嘉靖二十六年九月十六日也年僅五十朝野聞而哀之還葬于先塋之次迨今隆慶改元言官請曰原任山西巡撫副都御史孫繼魯特死非辜深爲可憫乞賜褒錄制曰可其贈孫繼魯兵部左侍郎謚清愍蔭一子給銀三百治其祠墳祭以文略曰爾刻意操持有皎然不污之節矢心樹立有毅然不屈之貞賢聲每著于立官清

廣雅歸于輿論特以壽邊之議恥于苟同乃來文致  
之詞陷于重譴式嘉素履特介新恩嗚呼公之清聲  
直節至是在天下萬世矣

都察院右副都御史張公綱行狀 周 延

公諱綱字美中別號午山姓張氏公自幼爲庠生時  
有聲家貧力學不以空乏動心嘗以義遜廩於張氏  
鳳儀時崆峒李子督學實雅重之中正德癸酉鄉試  
登嘉靖癸未進士初授工部都水司主事出督清江  
浦清江之督利柄所歸任是者多被論公清介性成  
秋毫無染淮浦間大饑人相食乃捐俸作粥以濟之  
所賴以活者數萬人死者施木以瘞鋤奸剔弊國計  
攸裕人皆便之而不利者亦有怨焉公署有紅蓮一  
池一夕盡變白人咸謂其清白所感御史淮陰李公

嘗詠歌之考滿得勅命之賜進階承德郎褒予特甚  
歷任署員外郎時修乾清宮命下買木衆皆難之公  
一不徇時態獨任是責竟得稱旨七年二月陞按察  
司僉事提督直隸廬鳳等處屯種兼飭潁州陸安等  
處兵備衛所屯田時有劇盜劉二者擁衆數千橫行  
郡邑人莫敢禦公設法擒捕竟賴以寧十一年陞雲  
南布政司左叅議十三年遷湖廣左叅議得便還家  
悉捐俸建倉糴穀倣古人社倉意以濟宗族鄉黨之  
貧者名廣義倉而自爲序記之是年冬陞湖廣按察  
司副使奉勅撫治流民曲爲拯救荆襄之流亡者如

歸父母十五年九月丁父憂十七年冬服除起雲南  
按察司兵備整飭騰衝金齒等處金西南極邊接境  
交趾所產多珍奇公素不把玩一無所利時雖有平  
交之懼乃能先事度勢與民安息華夷之間各得其  
所二十年陞廣西布政司左叅政戒行者幼如失考  
妣相率留公攀援戀弗能禁旣去百姓思之不已又  
相率立碑鐫遺愛二字以志善政歷陞雲南按察使  
廣西布政司右布政河南左布政使遂拜巡撫河南  
之命河南監制中原官務劬午而君蒞事直峻不苟  
居滿歲以勤勞之過痰疾驟作而沒時二十七年十

二月也櫬還民以素服沿道而送者遠數十里其所  
經歷處聞櫬來猶拜伏而迎年六十有四葬廬陵七

十都

都察院右副都御史秋厓朱公統廣志

自撰

此蘇長洲第一都之原邑人朱統歸藏之地枕先塋  
趾射瀆獅山導其前陽山澣墅擁其後都會通津經  
其左虎丘峙焉統字子純別號秋厓生於弘治甲寅  
九月朔時父圭奉府君以景寧教諭遭誣罷歸之二  
載嫡兄衣作亂出走下邳之二月也生母太宜人施  
坐蓐中毒不死三日保統就邑禁仲兄冠奪哺者信  
宿賴伯父孟輝伯兄清寧回冠復過太宜人讓賴中  
網糊口不死居百有十日弛禁百死之身太宜人以

百死全之孩提識趨髻亂經史得於府君諄嚴太宜  
人左右以底於成內難歲作歷涉艱險皆口不可得  
言者正德庚午入郡庠壬申遭嫡母馬宜人喪乙亥  
遭府君喪服闋巳卯領鄉薦庚辰會舉辛巳對大廷  
賜進士出身觀工部政乞差歸省嘉靖壬午除知景  
州癸未改開州三年考績進階奉直大夫 賜誥命  
丁亥陞南刑部員外郎司漕江巳丑陞郎中改南兵  
部司職方庚寅改南吏部司考功三年考績進階奉  
議大夫壬辰陞江西布政司左叅議甲午入賀不承  
當軸治弟之委陞四川按察司副使整飭威茂兵備  
實竄之也丙申平深溝諸賊部院上其功賜白金三  
綵幣三丁酉遭太宜人喪尋陞貴州左叅政不拜服  
闋辛丑補山東左叅政癸卯陞雲南按察司甲辰陞  
山東右布政使乙巳陞廣東左布政使時封川奏捷  
附名薦章賜白金一丙午提調鄉試將入覲過家遭  
人倫之變父子幾不免陞都察院右副都御史巡撫  
南贛汀漳等處地方提督軍務丁未改浙江巡撫兼  
福建海道提督軍務時以海寇猖獗創建此官而禁  
奸除寇勢利家所深害怠與忌者乘之十月入漳州  
平同安山寇按閩者信讒追論前任之遺得以功贖



平生辱薦二十一章至是始一被論然同安非前任所轄也十二月拜勅歷閱海防請以重典刑亂賜軍令旗牌八戊申三月至寧波撫海島倭夷六百餘人悉受約束入城四月襲破雙嶼賊巢五月寧波詐傳詔指教夷作亂以殺巡撫爲辭于時駐定海以鎮羣焚渡炎海入雙嶼以定不拔之計賊失其巢往來外洋者一千二百九十餘艘上下連戰皆捷六月閩人周亮奏革巡撫旣而漳囚逸入於海大擔嶼大步門大江諸警繹騷時疾甚呻吟規畫無敗績九月兵部錄雙嶼之功奏旌之賜白金一綵幣一十月拜勅改

命巡視遂輿疾督兵追賊下溫盤南鹿諸洋十二月大捷處州礦賊起衢州告急亦平之時經年建白多見阻撓仕途怨讟盈耳閩人林懋和倡狡夷覘我之說命下遣還業就約束寧波趙文華陷以南京侍郎脅以身後之禍說以市舶之利與屠僑屠大山內外交煽尤多乃連疏請骸骨申辯蹇蹇已酉自溫進駐福寧漳海大捷擒佛郎名王及黑白諸番喇噠諸賊甚衆度其必變乃傳令軍前執訊斬其渠魁安其反側先後以聞漸聞悉定五月得請生還困臥蕭寺屠僑嗾御史陳九德論以殘橫專擅衆欲殺之賴 聖

明在上姑視職候勘竊自歎一介書生叨冒至此靜思稱塞不過數事在開州恤里甲均戶役在職方革協守之橫在江西定安福均糧之籍剖東鄉安仁割圖之訟在威茂平番寨處邊饗在山東奪守涉之議在廣東在贛州平政刮垢而已然未如今日之自慊也人情如此果貴耳耶遂力疾取所集覽餘各卷刊定之著孤臣孽子之槩作俟命詞曰糾邪定亂不負天子功成身退不負君子吉凶既福命而已矣命如之何丹心青史一家非之一國非之人孰無死維成吾是治後事囑諸子以登第三十年府君未嘗一

命之榮不孝送死不計不受弔不祈碑銘配徐氏封宜人子六貞元郡庠生貞介貞則貞固貞孚貞訓邑庠生一女適盛之繼孫男七篆符簡簽簋篇籒女六家世劬勞載永感錄自撰壙誌虛卒葬月日如左

此誌甫就不意竟卒卒之日乃巳酉冬十二月十六日辛亥也姪男貞等遵遺命不敢久停遂以明年庚戌正月癸酉日葬兄

紹拔淚署尾

通議大夫都察院右副都御史吳公瀚墓志銘

嚴嵩

吳公諱瀚字受夫河南洛陽人也其先吳國人初曰阿演翁者以從戎隸河南衛遂家于洛焉曾祖諱成祖諱典父諱全俱以行誼聞于鄉母李氏於成化丙午六月二十八日生公少敏慧日誦數千餘言博覽羣籍發爲文辭迥出流輩與弟瀛同舉鄉薦又同第進士公初授南京山西道監察御史性素介直自負慨然有埋輪之志會中官廖鵬播虐河陝事發逮詔獄羣黨猶曲護之冀得末減乃抗疏列鵬罪狀竟寘

重典時論快之陞江西按察僉事公所蒞湖西訟訴  
繁委乃省文例詳聽斷發奸擿伏人稱神明嘗平反  
疑獄其人感泣繪公像祠之陞湖廣布政叅議守辰  
沅諸郡歲旱率吏民徒步雩禱雨隨沾足郡人歌頌  
其事時流殍載道請于撫臺發廩賑貸議欲行勘公  
曰勘則遲久亾者過半矣竟發之撫臺益重公疏薦  
其賢陞陝西副使整飭延安兵備有妖賊聯黨爲幻  
出沒無常悉計擒之陞陝西行太僕寺卿復陞山西  
按察使公法比精練爲衆推服凡大獄訊決罔畱囚  
無淹禁陞右布政使轉左使是歲虜酋擁衆寇太原  
城素無備公乃誓誓不分部固守而躬督糧出犒師已  
而援兵四集士獲宿飽衆賴以安又議築外城以固  
保障晉人至今德之陞應天府尹尋陞右副都御史  
奉勅巡撫畿甸兼督三關值邊疆多壘遣戍靡常乃  
廣積貯修器械簡士馬嚴校閱匝月而戰守之具各  
備又以馬水口李家嶺爲宣大要衝乃剷壁築垣增  
屯置戍備戒孔嚴後虜果至浮圖峪不得入議者以  
二堡經略爲有功焉無何以事忤時議以回籍聽用  
於是公乃還洛屏迹山墅人罕見其面撫按薦公經  
濟可以匡時清忠可以勵俗宜亟起用以慰人望

公竟以疾不起矣嘉靖庚戌八月八日其卒之日也  
享年六十有五公簡重沉密遇事能斷雖糾紛盤錯  
從容暇裕不動聲色以吏能稱于時性樂易不自岸  
異人尤樂從之事親孝處諸弟友愛弟泮瀛早世育  
其遺孤躬爲嫁娶與季弟不異爨俸羨悉付之不問  
出入雖通顯澹素如布衣時喜聲律晚益工集古句  
千餘首彙帙藏于家子二長三樂領省解第進士改  
翰林庶吉士歷官駕部郎中次三聘舉人

都察院右副都御史姜公儀行狀 劉曰睿

公諱儀字君肅姓姜氏別號伯溪世居南昌之淡里  
正德庚午中鄉試正德甲戌中會試歷任鳳陽永州  
廣平推官陞刑部主事署員外郎福建按察司僉事  
浙江布政司右叅議湖廣擢桂兵備副使左叅政廣  
西按察使福建左右布政巡撫湖廣兼贊理軍務都  
察院右副都御史罷鎮荆湖謫任叅知廣東使司事  
尋以疾乞休詔許歸籍冠帶閒住嘉靖己酉致仕在  
仕途凡三十六年居林下凡十有八年公在佐郡愛  
百姓如保赤子時鎮撫暴橫索常例急公毅然不與

鎮府百計害公不顧一時上下側目公之剛風動節于此露其端矣刑曹時不附權貴獄有冤抑者多爲雪之遇人與已違則勃然披抗不忍世情隱忍任閩時值海寇大掠公奮身整旅嚴賞罰選士卒寇抵岍公一鼓殲其梁魁俘獲餘孽寇遂蕩平任浙時簡靜清動雅稱藩體其官舍素稱不利前任者多移之公寧自處不利不忍貽不利于人而竟亦無恙其識見之定如此任郴桂時洞庭寇大爲民害公令魚艇悉爲仔甲而出已案牘賑費代爲課輸賊起聽其蟻附而擊之寇之所有盡以償勞官司不問由是衆心競

沿水  
九良

勸遵公約束計不勞而湖水陸平矣湖商民至今頌公蹟任貴州時上官多負固不服每嘒嘒出不利語衆計無所出公獨奮然欲飭兵殲之開陳利害曉諭禍福上官卽叩頭謝罪城池賴以無恐貴之士子偶於督學戾教令譁然多謀犯上諸當道懲以法而士子益散公從容名諭曰汝諸生能辯正氣與客氣乎毋錯認客氣爲正氣卽一不自覺第至平旦氣清明之際思之久有惶愧大不安者諸士試歸體察之如何士子忻然悅服解釋貴之士今尚慕焉方伯時操守愈勵自公俸外雖紙米分文亦一一登諸簿牘不

入私門近一週積羨餘幾萬公竟毫忽不干與時建  
寧諸路大歉府檄交上衆莫能救公獨慨然動庫藏  
金粟及所積羨餘亟圖援之衆議不可公曰朝廷設  
官分理無非爲民豈有惜數萬之金坐視赤子之饑  
死而莫之恤乎有利言吾自當之竟行所言活億萬  
人巡撫時休休寬大綽稱保釐日夕常供不過克腹  
日給廩餘悉以還民奉命征苗卽實心勤勞王事廣  
召募勤咨訪巧轉輸明賞罰一載破重寨三十餘生  
俘斬級踰萬而鬚髮爲之盡白其處功也每得一級  
公另貶之待生獲者辯真僞而後登紀公惟重民命  
而不自貪功故一時士卒畏服不妄殺一人楚地耆  
舊欣然有曹鄧之頌公之徹兵也先是奉命會同貴  
州巡撫協征公旣整兵十萬屯駐辰州晝夜竭力攻  
進破木葉重寨倒巖巘山巨巢闢地直止池河營已  
入苗境中心抵貴州疆界貴州撫院王學益畏忌不  
進是時湖二攻急苗遂逋掠彼方公于是奮然具疏  
劾奏王被逮赴京得罪王與逆犯嚴世蕃兒女至戚  
因觸蕃怒遂令王巡按劾公師久費財責令罷兵蕃  
遂擬旨謫授公任廣東布政司左丞議乃徹兵東赴  
不數月以疾上疏乞休詔可姜儀旣有疾着回籍冠

帶閑住於嘉靖己酉十一月獲致仕公生於成化  
未沒於嘉靖丙寅

都察院右副都御史安寧張公素行狀

公諱素安寧所軍籍公生而穎敏卓異凡兒鄉人深  
器之弱冠遊郡庠中正德癸卯科鄉試登嘉靖癸未  
科進士授南京工部主事雲南鳳安之變條陳時務  
五事一曰任將帥二曰嚴紀律三曰信賞罰四曰簡  
土著之兵五曰嚴土酋之任總制伍文定皆舉行之  
黃河泛溢奉命勘處經制事宜上下稱重嘉靖七年  
轉戶部廣西司員外郎十年轉本部湖廣司郎中會  
計出納惟允三載考績朝議以才識卓越改北戶部  
廣西司郎中公操持嚴正風裁凜然時人謂之部屬



風憲本部尚書許公讚極意嘉獎嘉靖十八年補湖  
廣按察司僉事兵備茶陵修舉臺憲一方振肅辯疑  
獄三十餘事湘潭之民有<sub>谷</sub>春陽之稱至今頌之  
洞庭賊窩十八家鼠竊狐<sub>積</sub>以歲月練兵殄靖時  
有八龍山逋寇勢甚猖獗<sub>民</sub>洶洶出方略以擒之  
一方賴以輯寧欽賜金幣<sub>巡撫</sub>都御史顧璘述其績  
以聞廟堂雅重之見於楚臺錄<sub>可</sub>徵焉嘉靖十七  
年陞本省布政司叅議時<sub>世宗</sub>帝駕幸承天督  
造行宮浮橋轉運夫役甚稱<sub>上</sub>十八年進秩河  
南按察司副使督理大名河南<sub>四</sub>聲績益著河北

之賊畏之不敢入境行勘邊隘議處允當兩臺交薦  
者二十餘疏二十年北虜內侵<sub>特</sub>旨簡用爲井陘  
兵備攻守兼施邊圉輯寧二十二年移鎮山東海防  
修治墩堡威靈赫然鹽徒震悚二十三年轉廣西叅  
政督理糧儲粵中豪富每多逋負公激勸完輸運餉  
不乏總制張岳御史馮璋徐南金交章以薦再荷賞  
賚二十六年擢四川按察司鞫罪折獄刑期無刑積  
牘停文迎刃而解僅百日轉本省右布政使二十八  
年轉左布政使旬宣德化周洽西蜀前此秤頭之弊  
收支之私一一釐革提調科場區畫邊務殫竭心思

皆協時論二十九年進秩都察院右副都御史巡撫四川開誠布公周旋清謹定松藩糧賦寬時制加科時銅仁比竄陟叛兵務方殷公爲之轉輸征調賴以成功奏凱之後復賜金幣三十年懇乞休致遂得如請焉六十有三以疾卒於家

都察院右副都御史石公簡行狀 章 詔

公石姓簡名廉伯字台之寧海人登嘉靖癸未科進士授江西餘干縣知縣政治化行吏民懷之嘉靖七年陞南京兵部武選司郎中時值考選殫力奉公黜陟允當考績之京不謁見權要陞刑部陝西司郎中改南京吏部文選郎中嘉靖十一年八月陞廣東高州府知府高州當猺賊焚掠之餘多方料理民得蘇息戴之如父母嘉靖十四年八月更直隸安慶府歸途遇盜囊橐一空及盜獲止供有服飾數件餘無他物士論歎服安慶地當七省之衝應酬不暇民甚苦

之爲之均賦役節冗費歲計省銀四萬梓爲定式迄  
今不廢去之日民至畱衣立石特祠祀焉十七年二  
月陞雲南兵備副使壞接安南民苦山賊荼毒且險  
阻勢難征勦公設計生擒二百餘人斬首不計其數  
地方以寧時有指揮犯罪將懷賂爲餽先以單目途  
中投遞卽重責寘于法貨物悉追入庫當道聞而稱  
之嘉靖二十年五月陞雲南右叅政二十二年六月  
轉湖廣按察使未幾陞貴州左布政使所至聲績卓  
異時五溪諸蠻四出劫掠攻勦弗克撫按以公威望  
檄委招撫遂單騎而往諭以禍福悉皆投順當道方  
將薦揚適抱病乞休奉旨致仕嘉靖二十八年巡按  
浙江裴御史薦補山東左布政使適征剿北虜庫有  
餘銀三千餘兩悉資兵餉嘉靖二十九年十月陞巡  
撫雲南都御史而歿平生忠信剛介正大光明利之  
所在一介不苟義所當爲貞志不回故蒞職精明政  
蹟炳炳而德澤之感人也深所得俸餘悉贖親族囊  
無私藏嘗營一室弗克落成終之日幾不能斂蓋入  
仕三十年以貧終其身在本縣則列序鄉賢在治地  
則崇祀名宦此可以見德望節義之彰著也

都察院右副都御史許公宗魯墓志銘

喬世寧

嘉靖己未少華許公卒其子庚與甲將以明年庚申  
葬公曲江原祖塋啓馬趙二恭人之壙合焉乃狀公  
事行以世寧志其墓石公生弘治庚戌今年益七十  
歲云余在姻屬曾爲詩壽公聞公健飯豪飲日賦詩  
行歌不輟謂公必得上壽不意其遽不起也余益有  
蒼生之歎而追惟長者之風也于是采事行大者爲  
志志曰公名宗魯字東侯號少華咸寧人也父贈太  
僕公鉉者商維揚嘗禱茅山祠下後生公客邸時母

孫太恭人益感異夢云正德丁丑舉進士選翰林庶吉士巳卯授雲南道御史嘉靖壬午按宣大癸未陞僉事湖廣提學三年陞副使兵備霸州丁亥復改湖廣提學巳丑陞太僕少卿壬辰陞大理少卿未幾陞僉都御史巡撫保定自保定歸十七年而當庚戌之冬復僉都御史駐昌平巳又陞副都御史巡撫遼東壬子乃致仕歸始公爲御史也卽劾論侍郎巡撫兩人會宸濠事起又上言親王護衛宜隸之守臣其刷卷蘇徽盡按諸大猾置之法所入銀穀至百數十餘萬今上御極又首上封事中有勤視朝罷傳奉絕貢獻惜爵賞重邊備寬徵斂尤關切時弊者巳又言常湯鄧劉之後義當復其封爵乃後四氏遂得復益自公言張本也大同將卒素驕悍難制公罪其尤甚者一二人于是將卒帖然先是太監劉祥沒邊餉以萬計然罪止罷鎮公復請下祥于獄祥大懼卽如數抵償而御史曹嘉論諸大臣也有給事中希大臣意論謫御史公力奏御史無罪至其劾武定侯郭勛太監蕭敬兩疏關利害尤大後以地震上疏又言羣小竊政柄宮壺議外事國是巳定而復易罪人方獲而遽釋益猶指助敬輩也一時以爲危言宣大故有大

邊正德初以地遠棄去不守然邊勢日蹙矣公行邊  
顧歎曰大邊急宜復者乃遂條畫狀聞顧當事者難  
之令補築近邊卽已工完 上亦賜公銀幣公又疏  
謝且辭因請 上無忽重地後宣大日益難守人始  
思公先見云湖廣以屬地曠遠督學者嘗數歲不一  
至公歲試輒遍所至卽以行義倡士風楚自是益多  
名士旣去霸州士日益思公乃爲具白撫按于是撫  
按交章借公而公復改督學楚中其繫時望若此是  
時又以救楚府二闕與御史力諍不屈二闕得不死  
人尤服其鯁直而太僕時禁中貴人不得與事中貴  
人銜之乃取服輦馬故以馬不中選困公公曰此馬  
誠不中選當爲奏取入監馬克之中貴人沮遂不易  
馬亦不敢復言事矣往保定以近畿民苦甚公嚴覈  
驛傳又定府州縣徭賦等式已又以築堤扞滹沱河  
有功 上特賜璽書銀幣旌焉是時公已受知遇矣  
而南給事有與公隙者顧以公湖廣時嘗刻書濫費  
論公罷歸縉紳咸爲公紬之後吏部尚書唐公龍都  
御史路迎柯相御史唐錡皆疏薦公庚戌會虜警給  
事中張秉壺御史張洽又會科道合疏薦公 上召  
公復都御史駐昌平昌平故無邊備公議修邊甞三

百里墩堡數百又疏請鞏華設一大將統入衛邊兵  
昌平改叅將守陵寢以鞏華分守駐懷柔爲東遊擊  
白羊口爲西遊擊又言昌平得一兵備治京北霸州  
者以治京南卽昌平撫臣可罷不設議未盡施用無  
何乃移公遼東至卽議處鹽課課大增諸軍占種民  
地者勒令悉歸之民遼東故與三衛諸夷互市部議  
北虜亦開市遼東公移書駁論不可者十事遂寢遼  
人甚賴之會有言公以詩酒怠事者公遂力求致仕  
歸歸時會虜入公部將斬首虜甚衆亦以常奏不報  
捷于是士論益歸重公日望公起官公顧益放情山  
水已卽別構草堂積圖書其中日名故所與遊者置  
酒賦詩亦時時作金元人詞曲爲樂所著少華集續  
集與陵下遼海歸田諸集數十卷其詩足繼惠音文  
復精典有漢魏風而作字又精詣古法諸行草大小  
楷書雜置法帖中人莫能辯公卽老猶能作小楷字  
當其得意時一揮輒數十紙不倦得公詩翰者咸珍  
玩藏之謂當代二絕云性又好客喜施卽少賤者必  
爲禮自宗室賢者與後進文士必求與公交卽海內  
善書工畫與諸技藝人一入關必先求見公公皆爲  
汲引延譽又言儀溫雅人一見卽以公爲親已至常

事臨利害復抗議不阿其卒也自親黨交遊與里中  
父老海內學士無不驚傳悲歎者公嘗別號思玄道  
人或又稱青霞道人卒之前二年嘗自爲志銘有曰  
有始有終萬化攸同委心自然與造物游其昭曠達  
觀下死生之際何有也其自樂天柳子厚之流乎公  
少孤受叔氏恩厚爲庶吉士聞叔氏病卽告歸至則  
叔氏卒矣常自恨不逮事叔氏事叔母愈益謹病革  
時獨悲歎曰吾不得終事叔母矣何以報叔氏地下  
此亦可以觀公公先世晉陽人宋末徙關中

都察院副都御史前提督南畿學校監察御史

楊公宜傳

京學志

公諱宜字伯時江陰衡水人嘉靖癸未進士任監察  
御史以風力著稱督學南畿藻鑑精確士一經其賞  
識無不得雋以去如瞿文懿陸宗伯諸公位卿寺登  
八座者數十人釐正文體敦崇行誼時以司馬文正  
公方之後總計畱京開府兩浙所至聲績蔚然至今  
士子稱正直忠厚者必曰裁菴先生云



虞臣錄

卷之六十二

六十一



